

8. júní 1973.

327

Nr. 155.

REGLUGERÐ

um könnun hjónavígsluskilyrða.

I. KAFLI

1. gr.

Beiðni um könnun hjónavígsluskilyrða skal beint til þeirra, sem löggildingu hafa til hjónavígslu samkvæmt ákvæðum laga um stofnun og slit hjúskapar nr. 60/1972.

Könnun fer fram í lögsagnarumdæmi, þar sem annað hjónaefna á lögheimili. Nú á hvorugt lögheimili hér á landi og fer könnun þá fram þar í umdæmi, sem annað þeirra dvelst.

2. gr.

Hjónaefni skulu leggja fram fæðingarvottorð, skírnarvottorð eða nafnvottorð. Sé þetta ekki unnt, skal hjónaefni færa sönnur á nafn sitt og fæðingardag með öðrum persónuskilríkjum, svo sem vegabréfi eða ökuskírteini.

3. gr.

Vígslumaður, sem annast könnun hjónavígsluskilyrða, skal láta hjónaefnum í té sérstakt eyðublað, þar sem veittar skulu upplýsingar um eftirfarandi atriði:

- 1) Fullt nafn hjónaefnis, starf, lögheimili, nafnnúmer, fæðingardag og -ár, fæðingarsað.
- 2) Ríkisborgarrétt hjónaefnis, ef það er ekki íslenskt.
- 3) Hvern hjónaefni ætlað að ganga að eiga.
- 4) Hvort hjónaefni hafi verið svipt lögræði.
- 5) Hvort hjónaefni séu skyld í beinan legg eða hvort þau séu al- eða hálf systkin.

Hvort annað þeirra hafi áður verið gift skyldmenni hins í beinan legg.

- 6) Hvort annað hjónaefna hafi verið ættleitt af hinu.
- 7) Hvort hjónaefni hafi áður stofnað til hjúskapar.
- 8) Hvort hjónaefni eigi í vændum barn/börn með öðrum manni eða konu. Einnig skal gefa upplýsingar um kjörbörn, en hins vegar ekki börn, sem hjónaefni hefur gefið til ættleiðingar.

Það skal koma skýrt fram, að hinu hjónaefna sé kunnugt um þessi atriði.

4. gr.

Ef hjónaefni er yngra en 20 ára og hefur ekki verið gift áður, skal það færa sönnur á, að foreldrar þess samþykki ráðahaginn. Samþykkið má gefa á sérstakt eyðublað, sem vígslumaður lætur í té.

Sé annað foreldra látið, geðveikt eða hálfviti eða fer ekki með foreldraráð eða þá að miklir örðugleikar eru á að ná til þess, nægir samþykki hins. Gera skal grein fyrir því, hvers vegna aðeins er fyrirbyggjandi samþykki annars foreldris.

Sé þessu þannig farið um báða foreldra, þarf samþykki lögráðamanns. Vottorð skal lagt fram um skipun lögráðamannsins.

Óskilgetið barn skal að öllu jöfnu hafa samþykki móður sinnar fyrir ráðahagnum. Samþykkis föðurins er einungis krafizt í þeim tilvikum, þegar hann fer með foreldraráðin.

5. gr.

Karl eða kona, sem eru yngri en 18 ára, skulu leggja fram leyfi dómsmálaráðuneytisins um, að þeim sé heimilað að ganga í hjónaband.

6. gr.

Sá, sem hefur verið sviptur lögræði, skal færa sönnur á, að lögráðamaðurinn sé ráðahagnum samþykkur. Leggja skal fram skilríki um skipun lögráðamannsins. Samþykkið má gefa á sérstöku eyðublaði, sem vígslumaður lætur í té.

7. gr.

Allar yfirlýsingar samkvæmt 3., 4. og 6. gr. skulu vera gefnar innan fjögurra vikna áður en beiðni um könnun hjónavígsluskilyrða er lögð fram. Þetta gildir þó ekki, ef framlagning beiðninnar hefur dregizt af sérstökum ástæðum, svo sem vegna umsóknar um undanþágu frá hjónvígsluskilyrði.

8. gr.

Hafi foreldrar eða lögráðamaður neitað að gefa samþykki sitt til hjúskaparins, skal leggja fram leyfi dómsmálaráðuneytisins um, að vígslan sé leyfð.

9. gr.

Sá, sem annast könnun hjónavígsluskilyrða, getur krafizt þess, að hjónaefni framvísi vottorði frá fæðingarlækni (eða sambærilegum lækni). Enn fremur getur hann krafizt læknisvottorðs um það, hvort hjónaefni sé geðveikt eða hálfviti.

Sé hjónaefni geðveikt eða hálfviti, skal það leggja fram leyfi dómsmálaráðuneytisins um, að því sé heimilaður hjúskapur.

10. gr.

Hafi annað hjónaefna verið gift skyldmenni hins í beinan legg, skal leggja fram leyfi dómsmálaráðuneytisins um, að því sé heimilaður hjúskapur.

11. gr.

Hafi hjónaefni áður stofnað til hjúskapar, skal það færa sönnur á með framlagningu viðeigandi gagna, að hjónabandinu sé slitið með lögskilnaði, ógildingu hjónabandsins eða með því, að fyrri maki sé látinn.

Sé fyrri hjónabandi lokið með því, að veitt hefur verið leyfi til lögskilnaðar hér á landi, skal leggja fram leyfisbréfið því til sönnunar, frumrit eða staðfest endurrit.

Hafi fyrri hjónabandi verið slitið með lögskilnaðar- eða ógildingardómi hér á landi, skal leggja fram því til sönnunar endurrit af dóminum. Sé um undirréttdóm að ræða og hinn lögmælti áfrýjunarfrestur, 3 mánuðir, er ekki liðinn, skal leggja fram skriflega yfirlýsingu frá gagnaðila og dómsmálaráðuneytinu þess efnis, að fallið sé frá áfrýjun dómsins. Sé áfrýjunarfresturinn hins vegar liðinn, skal leggja fram vottorð hæstaréttarritara þess efnis, að áfrýjunarstefna hafi ekki verið tekin út í málinu eða að áfrýjunin varði aðeins skilnaðarskilmálana, en ekki hjúskapar-slitin sjálf.

Hafi fyrri hjónabandi lokið með því, að veitt hefur verið leyfi til lögskilnaðar í Danmörku, skal leggja fram leyfisbréfið því til sönnunar, frumrit eða staðfest endurrit.

Hafi fyrri hjónabandi lokið með því, að veitt hefur verið leyfi til lögskilnaðar í Noregi, skal leggja fram því til sönnunar leyfisbréfið í frumriti ellegar þá vottorð norska dómsmálaráðuneytisins eða viðkomandi fylkismanns um, að leyfi til lögskilnaðar hafi verið veitt á ákveðnum degi. Staðfestingar á undirskriftum er ekki krafizt.

Hafi fyrri hjónabandi lokið með ógildingar- eða lögskilnaðardómi í Finnlandi, Noregi, Danmörku eða Svíþjóð, skal leggja fram því til sönnunar endurrit dómsins með áritun um, að dómurinn hafi fullt lagagildi. Þessa yfirlýsingu gefur dómsmálaráðuneytið í Finnlandi, en í Noregi, Svíþjóð og Danmörku viðkomandi dómstóll. Staðfestingar á undirskriftum er ekki krafizt.

Hafi lögskilnaður verið veittur í landi utan Norðurlandanna, skal málið fengið dómsmálaráðuneytinu til úrlausnar, að því er gildi skilnaðarins varðar.

Nú er fyrri maki látinn og skulu þá færðar sönnur á það með dánarvottorði eða vottorði skiptaréttar. Hafi maki látizt erlendis, skal lagt fram dánarvottorð, sem gefið er út af viðkomandi erlendu yfirvaldi. Skýrslur sendiráðs eða ræðismanna Íslands í viðkomandi löndum má einnig leggja til grundvallar.

Hafi lát fyrri maka borið að með þeim hætti, sem segir í lögum nr. 23/1922 um sönnun fyrir dauða manna, sem ætla má, að farizt hafi af slysum, skal leggja fram því til sönnunar staðfest endurrit dómsins.

Sé ekki unnt að færa sönnur á lát fyrri maka með þeim hætti, sem tilskilinn er í tveimur undanfarandi málsgreinum, skal málið fengið dómsmálaráðuneytinu til úrlausnar.

12. gr.

Sá, sem áður hefur verið í hjúskap, er lokið hefur með lögskilnaði eða ógildingardómi, skal leggja fram eftirfarandi gögn, eftir því sem við á:

1) Vottorð skiptaréttar um, að félagsbúið sé eða hafi verið til opinberrar skiptameðferðar, eða

2) yfirlýsingu fyrrverandi maka þess efnis, að einkaskiptum sé lokið eða að hann hafi engar frekari kröfur fram að færa til skipta á eignum félagsbúsins gagnvart þeim, sem ætla að ganga í hjónaband að nýju, eða

3) endurrit dóms til lögskilnaðar, skilnaðar að borði og sæng eða ógildingar hjúskapar eða leyfisbréf til lögskilnaðar eða skilnaðar að borði og sæng, þar sem tekið hefur verið upp ákvæði þess efnis, að skiptum félagsbúsins sé lokið, eða

4) þinglýstan kaupmála þess efnis, að séreignarfyrirkomulag hafi verið í fyrri hjónabandi, eða

5) vottorð um, að fyrri maki hafi að nýju gengið í hjónaband hér á landi, eða

6) undanþágu frá dómsmálaráðuneytinu, shr. 10. gr. i. f. l. nr. 60/1972.

Hafi fyrri hjónabandi lokið með láti annars hjóna, skal leggja fram því til sönnunar eftirfarandi gögn eftir því, sem við á:

1) Vottorð skiptaréttar þess efnis, að félagsbúið sé eða hafi verið til opinberrar skiptameðferðar, eða

2) vottorð skiptaréttar þess efnis, að félagsbúið hafi verið afhent til einkaskipta ásamt yfirlýsingu allra erfingja hins látna eða umboðsmanna þeirra um, að skiptum sé lokið, eða

3) vottorð skiptaréttar þess efnis, að hinn látni hafi ekki látið eftir sig neinar eignir, eða

4) vottorð skiptaréttar þess efnis, að eignum búsins hafi verið varið til að standa undir kostnaði við útförina, eða

5) vottorð skiptaréttar þess efnis, að hið eftirlifandi hafi fengið að halda eign-um félagsbúsins, sbr. 59. gr. skiptalaga, eða

6) yfirlýsingu allra erfingja hins látna um, að þeir geri ekki kröfu til búskipta, eða

7) þinglýstan kaupmála eða vottorð skiptaréttar þess efnis, að fullkomin sér-eignaskipan hafi verið í hjónabandinu, eða

8) undanþágu frá dómsmálaráðuneytinu, sbr. 10. gr. i. f. l. nr. 60/1972 um stofnun og slit hjúskapar.

Yfirlýsingar samkvæmt 2. tl. 1. mgr. og 2. og 6. tl. 2. mgr. má gefa á sérstöku eyðublaði, er vígslumaður lætur í té.

13. gr.

Sá, er annast könnun hjónavígsluskilyrða getur krafizt þess, að hjónaefni leggi fram löggilta þýðingu á vottorðum og skilríkjum, sem eru á erlendum tungumálum.

14. gr.

Nú vilja hjón, sem fengið hafa lögskilnað, gifta sig að nýju, og gilda þá venju-legar reglur um þá hjúskaparstofnun.

15. gr.

Nú kemur fram mótbára gegn því, að hjónaefni geti gengið að eigast, og skal þá sá, er annast könnun hjónavígsluskilyrða, meta réttmæti mótbárunnar.

16. gr.

Sé öllum hjúskaparskilyrðum fullnægt, gefur vígslumaður (sá, er annast könnun hjúskaparskilyrða) út sérstakt vottorð því til staðfestingar, að vígsla megi fara fram. Vottorðið skal afhent þeim, er annast vígsluna.

II. KAFLI

17. gr.

Nú eru hjónaefni, annað eða bæði, búsett erlendis, en óska leyfis til að stofna til hjúskapar meðan á dvöl stendur hér á landi, og gilda þá reglurnar í I. kafla, sbr. þó eftirfarandi málsgreinar.

Eigi hjónaefni ríkisborgararétt og lögheimili erlendis og vígslumanni (þeim, sem annast könnun hjónavígsluskilyrða) er kunnugt um það, að fyrirhugaður hjúskapur mundi fara í bága við lög þess lands, þar sem hjónaefni er ríkisborgari eða á lögheimili, má vígslumaður ekki gefa út könnunarvottorð (vottorð um, að hjónavígsluskilyrðum sé fullnægt). Byggist hindrunin í hinni erlendu löggjöf á almennu banni við hjúskap fráskilinna manna, gildir þetta þó ekki.

Samþykki foreldra eða lögráðamanns samkvæmt reglunum í 4. og 6. gr. er ekki nauðsynlegt, ef slíks samþykkis er ekki krafizt í lögum þess ríkis, þar sem hjónaefni á lögheimili. Skal hjónaefni gera fullnægjandi grein fyrir lögum heimalands síns um þetta atriði, sé þess krafizt. Þeir, sem náð hafa 20 ára aldri, þurfa ekki samþykki samkvæmt 4. gr., þótt það sé áskilið í lögum þess lands, þar sem hjónaefni á lögheimili.

Nú hefur í einhverju hinna Norðurlandanna átt sér stað könnun á hjónavígsluskilyrðum fyrir hjónaefni, sem ekki á ríkisborgararétt í neinu þessara ríkja, og þarf þá ekki að fara fram könnun að nýju hér á landi fyrir hjónaefnið.

Sé ekki unnt að gefa út könnunarvottorð samkvæmt 2. mgr. þessarar greinar, skal málið fengið dómsmálaráðuneytinu til úrlausnar.

Um könnun á hjónavígsluskilyrðum fyrir borgara í Danmörku, Noregi, Svíþjóð og Finnlandi gilda reglurnar í III. kafla.

III. KAFLI

18. gr.

Eigi hjónaefni ríkisborgararétt í einhverju hinna Norðurlandanna, skal kanna rétt þess til að ganga í hjúskap eftir íslenskum lögum, ef annað hjónaefna á lögheimili hér á landi, ella eftir lögum þess ríkis, þar sem hjónaefnið á ríkisfang. Ætíð skal þó beita lögum þess ríkis, sem hjónaefnið á ríkisfang í, ef það óskar þess.

19. gr.

Nú skal kanna rétt til að ganga í hjúskap eftir lögum þess ríkis, þar sem hjónaefni á ríkisfang og getur þá sá, er annast könnun hjónavígsluskilyrðanna, krafist þess, að rétturinn til að ganga í hjúskap sé sannaður með vottorði viðkomandi stjórnvalda í því ríki. Sé slíkt vottorð lagt fram, þarf ekki að framkvæma frekari könnun á rétti hjónaefnis til að ganga í hjónaband.

Könnunarvottorð (vottorð um, að hjónavígsluskilyrðum sé fullnægt) gefa út:

1) Í Danmörku: Viðkomandi sveitarstjórnaryfirvald (í Kaupmannahöfn: Magistratens 1. afdeling).

2) Í Finnlandi: Prestsembætti, borgaralegt yfirvald, sem stendur fyrir lýsingu, sendiráð eða ræðismannsskrifstofa.

3) Í Noregi: Dómsmálaráðuneytið eða sendiráð.

4) Í Svíþjóð: Prestsembætti, ambassador, sendiherra, ræðismaður eða deildarstjóri lagadeildar utanríkisráðuneytisins.

Vottorðið má ekki vera meira en fjögurra mánaða gamalt, nema annað sé ákveðið í vottorðinu sjálfu.

20. gr.

Reglugerð þessi, sem er sett með stoð í lögum nr. 60 frá 1972 um stofnun og slit hjúskapar, öðlast gildi þegar í stað.

Dóms- og kirkjumálaráðuneytið, 8. júní 1973.

Ólafur Jóhannesson.

Friðrik Ólafsson.

DÓMS- OG KIRKJUMÁLARÁÐUNEYTIÐ

Embætti sem gefur könnunarvottorð út

KÖNNUNARVOTTORÐ

Dags, könnunarvottorðs

Könnunarnúmer

Maðurinn	Konan
Eiginnafrn og fœðurnafn	Eiginnafrn og fœðurnafn
Starf	Starf
Lögheimili (húshæiti, gata, númer)	Lögheimili (húshæiti, gata, númer)
Sveitarfélag	Sveitarfélag
Fæðingardagur og -ár	Fæðingardagur og -ár
Nafnnúmer	Nafnnúmer
Fæðingarstaður	Fæðingarstaður
Ríkisfang	Ríkisfang
Lögheimili eftir vigsluna	
Samþykki foreldra	Samþykki foreldra
☐ Já ☐ Nei	☐ Já ☐ Nei
Samþykki lögfráðamanns	Samþykki lögfráðamanns
☐ Já ☐ Nei	☐ Já ☐ Nei
Útgáfudagur leyfis dómismálaráðuneytis skv. 1. gr. hjúskaparlaga	Útgáfudagur leyfis dómismálaráðuneytis skv. 1. gr. hjúskaparlaga
Útgáfudagur leyfis dómismálaráðuneytis þrátt fyrir synjun foreldra	Útgáfudagur leyfis dómismálaráðuneytis þrátt fyrir synjun foreldra
Hefur áður verið kvæntur	Hefur áður verið gift
☐ Já ☐ Nei	☐ Já ☐ Nei
Síðasta hjónabandi lokið með	Síðasta hjónabandi lokið með
☐ Láti maka ☐ Lögskilnaði ☐ Ógildingu	☐ Láti maka ☐ Lögskilnaði ☐ Ógildingu
Nafn síðasta maka	Nafn síðasta maka
Skjal er staðreynt sít síðasta hjónabands	Skjal er staðreynt sít síðasta hjónabands
Útgefandi þeirra	Útgefandi þeirra
Útgáfudagur þeirra	Útgáfudagur þeirra
Eignaskipti, séreignaskipan; skjal	Eignaskipti, séreignaskipan; skjal
Athugasemdir (m.a. um leyfi frá dómismálaráðuneytinu um könnunarvottorð erfendis frá eða um bátingu erlends réttar)	
Undirskrift hjónaefnis	Undirskrift hjónaefnis
Arntun vigslumanns (Vigsludagur, -staður og undirskrift)	Undirskrift könnunarmanns og embættisstimpill